

Pauro Korose ezektsa bo ziwatahaka

Amata, Epaparas tili ziky Korose ezektsa Jesus harere nitsasoko. Sizubarētsa ihumo sispirikporētsa niyziknaha. Bykyze ustsa myhyrinymyrykynahatsa wasanibara ty nisihyrinymyryky iwaze nisimiywykynahha, wastuhu Jesus humo batu sispirikpohuk. Iwaze Pauro ispe niy:

— Jesus humo zuba ma tahaktsa atahi zuba mysopyksapybyri humo mymyokzohik —. Deus hyrikoso Pauro tuk niapykyryk iwatahi Deus harere ziwatahaka iwatsahi katsa kino niwatihi Deus soho humo tanymyryky.

1 ¹Uta Pauro. Kiristu Jesus zikybzota. Tubabatu Deus kape niy:
— Ikiakta myzubaha bokta. Wasaniha ty sibo tytsaso — niy.
Hyŷ iky. ²Abaka ikiahatsa bo piwatahaka Timoteo katuk. Atahi mytuky mytuk Jesus harere bo hyŷ mynakara. Ikiahatsa Korose ezektsa bo tawatahaka. Ikiahatsa mytukytsa niwatihi Jesus harere bo hyŷ tsimykaranaha ihumo ahspirikporētsa. Uta Deus bo mopamykysoko:
— O Deus myzo. Ikia Korose ezektsa tysipokzitsiki, ahumo sakurētsa moziknaha — my.
Iwa Deus bo ahatsyhyryze mopamykysoko. Iwa Deus nizihikik.

Pauro Deus bo nipamykysoko, ihumo tsakurēta nikara.

³⁻⁴Hawa ikiahatsa Kiristu Jesus harere bo hyŷ tsimykaranaha iwatsahi ihumo ahspirikporētsa tsimoziknaha. Hawa Deus tyryktsa humo ahamypokzitsiukrētsa anahi botu tsiwabynaha. Iwatsahi katsa ahatsyhyryze Deus bo tsimypamykysokonahaze mykurētsa. Deus Jesus Kiristuzo bo tsimypamykysoikiknaha.

— O Deus Korose ezektsa humo mykurētsa. Tynasipokzitsiki — tsimaha. ⁵Tapara Jesus soho wasaniha tsiwabynahaze yhŷ tsikaha. Katsaktsa ahape tsimaha:

— Sizubarētsa asahi Jesus humo sispirikpotsa Deus tuk mynapykyryknaha tsimaha, iwatsahi ahspihikrētsa tsikykaranaha. Ikiahatsa Jesus harere bo hyŷ tsimykaranaha iwatsahi tsimyhyrikosokdanaha zeka Deus tuk tsimypykyryknaha. Ana harere bo

hyŷ tsimykaranaha ana humo hi ahaspirikporētsa tsimoziknaha. Iwatsahi Deus tyryktsa humo ahamypokzitsiukrētsa. ⁶Deus pahapokzitsiki. Mywatu namypokzitsiki anahumo hi ahahyrinymȳrētsa. Deus wasania ty nikaraze tsiwabykynahaze wasani tsikaha. Abaka ustsa kytsa Deus wasaniha piwabykynaha. Ahawatsa Sesus harere bo hyŷ mykaranaha iwatsahi ihumo sispirikporētsa. Deus tyryktsa humo simypokzitsiukrētsa. Deus tuk mynapykyryknaha anahi aha watsa piperykynaha.

⁷Epaperas Sesus soho ababo nitsasoko. Atakta mytuk nikara. Sesus pokzitsiw y tuk tarabaja ziknakara. Kiristu tsumuēhītsa niyze mytsyhyryze nimytsumuēhīkī. ⁸Ata hi:

“O Korose ezektsa Sesus tuktsa humo tyharape pokzitsinaha. Deus hyrikoso situk mynapykyryk iwatsahi Deus tyryktsa humo simypokzitsiukrētsa” — niy.

⁹Ana tsiwabynahaze ahatsyhyryze Deus bo ziknapamykysokonaha. Katsa ahatsyhyryze Deus bo tsimypamykysokonaha:

— O Deus Korose ezektsa mytukytsa tysihyrinymyry. Hawaha mozurukunaha humo tysihyrinymyry. Imysapybara sibo tsiwatawy. Aokze wasaniha humo tysihyrinymyry. Ahyrikoso mysihyrinymyryky iwatsahi hawaha humo mozurukunaha zeka mytsaty maha — tsimaha. Ispe tsimaha:

— O Deus hyrikoso pahahyrinymyryky — tsimaha. ¹⁰Iwa zeka ihyrinymyrytsa hyŷ tsimykaranaha zeka hawa ha sa Deus mozhikik tsimykaranaha. Myzibyituhukutu mypehakatsa ahahumo tsakurēta. Hawa haty tsimyzurukunaha zeka tsakurēta. Kytsa kino niwatihi tysipokzitsikinaha. Iwa tsimyzurukunaha Deus soho tsipinymyrytohinaha.

¹¹Iwatahi Deus bo mopamykysoko:

— O myzo ikia Korose ezektsa ahumo sipunihikrētsa moziknaha. Ikia zuba tsapunihikrēta. Ikia tsamysapyrēta iwatahi tysipunihikwyky. Iwaze sipunihikrētsa moziknaha. Kytsa mysimyijakaranaha zeka tysibetesa. Sinini mykaranahaze ahumo siakubyrisorokrētsa — my iwa Deus ahatsyhyryze mopamykysoko my. ¹²Deus myzo mypehakatsa my. Okoroze kywaha tisapyrēna bo iktsa tsimaha. Katsaktsa mypehakatsa harere bo hyŷ tsimaha zeka kytsa watsa tisapyrēna bo iktsa maha my. Ikiahatsa Deus tyryktsa tsimoziknaha. Tatyryktsa mysipokzitsiki. Amy isapyha piperyky iwaze hi ikiahatsa bo nyny my, ana hi taperyky. Ahakuhuktsa. Deus pe tsimaha:

— O Deus ikia zuba tsamysapyrēta. Ikia humo ka mykurētsa. Katsa ikia tyryktsa tsimoziknaha. Mykurētsa tsimoziknaha — my.

¹³Satanas batu imysapy. Kytsa papatu ituktsa imysapybara ty nikaranaha iwororobara siakparawy unata kywaha my. Ityryktsa simysapybyitsa mykaranaha. Imysapybyikia ty mykaranaha anathyhi

ityryktsa mykaranaha. Deus babata zuba mymybetesaka iwatsahi Satanas tserekeknaha. Abaka Satanas harere bo ba ma tsimaha. Deus tse harere bo zuba hȳ tsimynakaranaha. Deus tse zuba myhumo tsimypokzitsiarēta. Atahi namybetesa.¹⁴ Sesus tazo bo mymyoktyhyryk. Nihyrikosokdaze Deus mysapybyri ihumo nimyokzohik. Abaka Deus okzeka wasani niyzik iwatsahi mykurētsa h̄y.

Kiristu myhyrizikwy babata my.

¹⁵ Nanabyi isuknihibyize ba amy tohi bo zikozonaha Kiristu ta Deus wata. Kiristu tsinynaha. Deus bo ka ba zikozonaha. Kiristu zuba tsinynaha. Kiristu ta Deus tse babata niy. Estuba zubata itse. Deus nanabyity tysukni ahabyize Kiristuta koikny baktatu ituk ziknapykyryk. Atahi taparakta tu.

¹⁶ Deus nanabyi Kiristu humo nizukniki. Deus bijoikpe mybarawy ahapetuk nizukninaha. Nawa ha ty nanabyi bo natanykynaha. Deus Kiristu tuk nizuknikinaha. Nanabyi zinynahabikia mybarawy humo kino niwatihi Deus Kiristu tuk nizuknikinaha. Bijoikpe iknyktsa Deus tsumuēh̄tsitsa niwatihi nisisuknize. Wastuhu hyrikoso sapybara niyziknahatsa kino niwatihi Deus hi nisisukni. Deus, Kiristu harapetok sihumo nanabyi nizukniba. Atahi tazo tuk myzubaha nizuknikinaha. Anatyhi Kiristu bo niy, iwatsahi myzubaha Kiristu harere bo yh̄ mykaranaha.

¹⁷ Tapara nanabyi suknihibyize tu Kiristuta tapara kino niwata tu koikny baktatu. Bijoikpe mybarawy iwha ihumo mynapykyryk. Iwha hi tasapy eze tu mynapykyryk. Ihumo nanabyi tisapyrēna maha.¹⁸ Sesus Kiristu parakbaha mysiakzo. Sizubarētsa mozumubanahaze iharere piwabynahaze mysiakzoko. Mypehakatsa babata my. Atahi myharek wata. Hawa myharamitsī humo hi mytsaty tsimykaranaha iwa tsimykaranaha katsaktsa Kiristu harere humo tsimykaranaha. Myzubaha hi mynury wata. Iwaze Kiristu tyryktsa iharere bo zuba hȳ mykaranaha. Atahi Deus tse babata. Nihyrikosokdaze Deus zihyrizikpowye tsimysapyrēta niyzik. Myzubaha iharere bo hȳ mykaranaha. Atahi myhyrizikwyrēnikita babata niyzik atahi abazubata niyzik, ba hawa tohi zikzukninaha.

¹⁹ Deus tatuktuka nikara — O katse kawata mozihikik — Kiristu Deus astsatu my.

²⁰ Mybarawy ezektsa Deus bo ma zikahabyitsa. Sinini ykarawy ezektsa kino niwatihi Deus humo tahakyrikinaha. Iwaze Deus mybarawy ezektsa humo taokaniki iwatatu mahani iokani hyrinymyry iwaze hawa meky watu moziknaha mytsaty nikara. Atahi:

— Katse babata iharapatawyhyta humo pibezenahaze iwaze meky watu mytsaty mykaranaha. Kaharere bo hȳ mykaranaha — niy. Iwa Deus tatuktuka nikara. Mybarawy ezektsa humo mahani iokanihyrinymyry.

Abaka Kiristu harereziuwytsa tsikyziknaha.

21 Taparaka Sesus harere bo ma ahabyitsa iwatsahi Deus sukyrytsitsa moziknaha. Ikiahatsa ihumo batu ahakparawy. Iwatsahi hawa sa batu ahasopyksapy ana humo hi mytsaty tsikykaranaha. Hawa sa batu imysapy tsikykaranaha. Deus ahakparawybyitsahi iwatsahi ahamysapybyitsa tsikykaranaha. 22 Abaka meky watu tsimoziknaha. Deus harereziuwytsa zuba tsikyziknaha. Itse babata ahasapzyeky nihyrikosokda iwatsahi itukytsa tsimoziknaha. Iwatsahi wasani tsiomykaranaha. Iokzeka tsimyzumunahaze batu ahasikpyby tsimaha. Batu aty tohi ahasoho humo:

— O ikiahatsa batu ahasopyksapy — maha. Ikiahatsa hi ahamysapyrētsa tsimoziknaha hŷ.

23 Ikiahatsa hi Deus harere humo tsimyspirikpotohinaha. Iharere bo ka hyŷ tynakaranaha. Katsaktsa Deus tuk mywahi tsimynapykyryknaha ana hi taperyky. Ipery humo ahapunihiku ja. Utakta Deus wasania ty motsasoikik anahi kahyriziktsokzawy. Nanabyitaba kytsa bo Deus wasaniha motsasokonaha hŷ.

Pauro Sesus tuktsa nisitsumuēhīekik.

24 Abaka kakurēta. Ahatsyhyryze sinini mykaratatu kakurēta. Kiristu myzubaha bo sinini nikaraze. Asaktsa mozumubanahaze iharere piwabynaha sihumo sinini mykara. Asahi Kiristu nury watsa. Iwatahi uta kino niwatihi sinini mykara. Ikiahatsa pokzi Kiristu nury watsa sinini mykara. 25 Deus kape niy:

— Wasaniha ty tytsasokokta. Kytsa Sesus humo sispirikporētsa asahi katyryktsa maha iwatsahi sibo wasaniha tsiytsasoziku! Katyryktsa tysiitsumuēhī — niy. Atahi anaty kabo ziwatawy iwaze hi nanabyitaba wasania ty motsasoziku.

26 Taparaka Deus batu harere aha kytsa iharere batu siwabyhy. Deus wasaniha batu aty tohi ty tyhydrinymy. Abaka meky watu. Kytsa Deus harere bo hyŷ mykaranaha ihumo sispirikporētsa iwatsahi wasani haty pinymyrykynaha.

27 Abaka myzubaha iharere piwabykynaha ana hi Deus mozihikik. Taparaka batu ahahyrinymy abaka wasania ty pahahyrinymyryky. Iharere tisapyrēna, iwatahi myzubaha bo motsasoko. Sudeustsabyitsa bo kino motsasoko. Tapara Kiristu ahatuk ziknapykyrykze batu ahahyrinymyryhu abaka ahahyrinymyretsa hŷ. Deus humo hi ikiahatsa ituk tsiytnapykyryknaha nizihikik iwatahi tsakurēta.

28 Katsaktsa Sesus Kiristu soho tsiytsasokonaha. Nanabyitaba Sesus soho tsiytsasokonaha. Hawa imysapybara humo maha zeka tysiispirikpokonaha. Nawa mozurukunaha zeka mysihyrinymyrynah.

Nawa Deus mozihikik iwa mozurukunaha. Tymyi habyitsa tsiksihyriny myrybanaha. Iwaze Deus okze mozumunahaze atahi:

— O asahi wasani mykaranaha. Kiristu tuk mozurukunaha iwatsahi simysapyrētsa moziknaha — my.²⁹ Iwataatu utakta mysitsumuēhīkī. Deus tazikwy ty kabo nyny mykara iwatahi ihyriziktsokzawy humo mynakara. Atahi moziktsumuēhīkī, ana humo hi mysihyriny myryky.

2 ¹— O kytsa kaharere tsiwabytoktonahaktsa. Hawa ahatusmuēhīkik, naħħi tsinymyrynah. Raodisija ezektsa kino niwatihhi asahi Sesus harere bo hyŷ mykaranaha iwatsahi ihumo sispirikporētsa, iksitsumuēhīkī. Ustsa kytsa Sesus tuktsa kanyhybyitsa kino iksitsumuēhīkī. ² Iwatsahi sizubarētsa sipunihikrētsa moziknaha. Tyharape pokzitsiknaha. Kahyriziktsokzawy humo ikiahatsa ahakurētsa tsimoziknaha. Tsimyharape pokzitsiknaha zeka Deus harere tsipinymyryziunaha iwaze ahaspirikporētsa tsimoziknaha. Taparaka Deus harere batu aha ana humo hi Kiristu kino pahahyrymyryky.
³ Ata zuba Deus myspirikpowy mynatsasoko. Deus tasopyk mynatsasoko. Katsaktsa Kiristu harere bo hyŷ tsimykaranahaze wasaniha humo myhyrinymyrētsa.

⁴ Iwatahi ababo piwatahaka “Mytsatyziutaha kytsa!” Iwaze ba aty tohi ababo zahaspihikbata. Siharere wasani mykaranahatsa watsa. Iwatsahi siharere bo ka waby waby byitaha! Pahaspihikbatakanahaze pahamyikinaha.

⁵ Iwatahi utakta ahasoho bo mytsaty mynakara. Utakta ahatuk byitatu ahasoho bo mytsaty mynakara. Ikiahatsa Kiristu humo ahaspirikporētsa ana humo hi kahyryny myrēta. Ikiahatsa Kiristu humo ahaspirikporētsa tsimykaranaha iwaha humo kakurēta — my.

Kiristu tuk tsimyzurukunahaze meky watu tsimoziknaha.

⁶ Ikiahatsa hi:

— Sesus imysapyrēnikita. Iharere bo zuba hyŷ tsimykaranaha — tsimaha. Iwaze iħarere bo zuba hyŷ tynakaranahaktsa! ⁷Hwi jobonitakta iħaratatsa wytyk zihboani tahasapynaha niy. Katsaktsa hwi watsa Sesus humo myspirikporētsa iwatsahi mypunihikrētsa tsimoziknaha. Iwatsahi ihumo tsimyspirikpotoħinhaktsa! Nawa isoho tsinymyrykynaha ana ty hi tsimyzurukunaha. Deus myzo bo tsimypamykysoknaha:

— O myzo ikia zuba tsamysapyrēta. Ikia humo ka mykurētsa — tsimykaranaha.

⁸ O kytsa pykyhytutaha! Sesus soho humo mytsatyziutahaktsa. Ustsa kytsa hi:

— Sesus harere bo batu hŷ — zikaha. Asa hi ihumo batu sispirikpo. Siharere bo ka waby waby byitaha. Ikiahatsa siharere bo yhŷ tsimykaranaha zeka pahaspihikbatakanaha asahi Deus harere

bo batu hŷ mykaranaha. Myzotsa siakbatsa harere humo zuba pahahyrinymyrykynaha. Siharere ty pahaspihikbatakanaha ahabo mybarapetu mykaranaha.⁹ Kiristu Deus wata. Sesus mybarawy bo inasikze nimyhyrinymyryky. Nawa haty Deus mykara anatyhi nimyhyrinymyryky. Kiristu mytukze zikzurukuze astsatu Deus niy. Kiristu bo tsikozonahaze Deus soho humo tsinymyrykynaha. Kiristu Deus wata anahumo hi Deus soho tsinymyrykynaha.¹⁰ Kiristu harere bo hyŷ tsimykaranaha zeka Deus tazikwy ty mybo nyny my. Mymysapyrētsa tsimoziknaha. Kiristu imysapyrēnikita atahi abazubata my. Bijoikpe iknyktsitsa Deus tsumuēhītsitsa iharere bo hyŷ mykaranaha. Hyrikoso sapybara Satanas tsumuēhītsitsa iharere bo hyŷ mykaranaha.

¹¹ Kiristu tazikwy ty mybo nyny mykara. Tazikwy humo ahamysapybyitsa tsikykaranaha anahi tsimoewynaha. Deus nimyokzo iwatsahi ihumo tsimynapykyknaha. Mekywatu mytsaty tsimykaranaha Deus humo zuba meky watu tsimoziknaha. Sudeutsa tahanury humo tahapiakzyzyknaha iwa meky watu nikaranaha. Siwatahawu humo Deus okzeka meky watu niyziknaha. Katsaktsa niwahabyitsa. Deus hi mybo nimywatawy iwaze ihumo meky watu mytsaty tsimykaranaha iokzeka metutu tsimykaranaha. Iwaze mynury humo batu mytwataha. Katsaktsa Sesus tuk tsimynapykyryknaha ana humo hi ahamysapyrētsa tsimoziknaha.

¹² Kytsa nimyharasusukunahaze moranahaze mymyhatoto nahaze kywa Kiristu nury nitsahoroknahaze kywhi. Deus Sesus izihyrizikpowy ikiyahatsa kino niwatihi tsinahyrizikpobanaha Kiristu watsa, Deus zikwy humo meky watu mytsaty tsimykaranaha ahamysapyrētsa tsimoziknaha. Deus Sesus Kiristu izihyrizikpowy ana hi sizikwy atsatu. Ata bo hi hyŷ tsimykaranaha zeka ahamysapyrētsa tsimoziknaha.

¹³ Taparaka ikiyahatsa siakbatsa watsa. Deus harere bo yhŷ ahabyitsa ziknakaranaha. Moises harere bo yhŷ ahabyitsa ziknakaranaha. Ahamysapybyitsa tsikykaranaha. Abaka Deus humo meky watu tsimoziknaha. Hawa Kiristu mytsaty mykara ikiyahatsa kino niwatihi mytsaty tsimykaranaha. Ahamysapybyitsa tsikykaranaha humo nimyokzohik.¹⁴ Deus harere humo tsikspirikponaha ka iharere katsa myhumo tsihokdaharēna iwatsahi ma ahabyitsa ziknakaranaha, iharere ty waby byizeka ana humo hi tsihyrinymyrēta. Iwaze Kiristu iharapatawyhyta humo nihyrikosokdaze iwatahi Deus mysapybyi humo nimyokzohik. Ana humo hi nispirktsokda baba mysapybyi zipykbaik. Hawa kytsa namy zibykykspyknaha bykyze tysirezo tsikaha, batu amy tohi ty zikaha. Iwaze astatu Sesus mysapybyitsa tu tsikykaranaha humo iwahatu niokzo. Abaka ba zikzisirezona tsizubarēna nepykba.

¹⁵ Kiristu hiba Satanas hyrikoso sapybara pehakatsa zikwy imysapybara zepykbaik. Iharapatawyhyta humo nihyrikosokdaze Satanas

hyrikoso sapybara pehakatsa zikwy imysapybara zepykbaik. Iwaze myzubaha iwa zihyrimyrykynaha iwatsahi sisikpybyrētsa niyziknaha. Sesus ipunihikanikita ipokso sisikpybyrētsa nikaranaha.

¹⁶Kytsa pahakzo zeka:

— O kytsa ana disahawy ty ka hauk hauk ahabyitaha. Ahaokpuwy ty ka tsō tsō byitaha! Nawa puruze tarabaja byitaha! Byzoje iokpe Zubakata mynayzikze tsikahamyikahanahaktsa sabado eze mybyrywy zuba iwaze tarabaja tarabaja byitaha! — mykaranaha. Iwa motsasokonaha zeka siharere bo waby waby byitaha.

¹⁷Tapara Kiristu izumuze siharere bo yh̄y tsikykaranaha. Hawa ebuhuka bo iktsa tsimahaze anaka bamytohi, iwaze siharere ebuhuka hyrity waha Kiristu harere baba zuba my. Abaka Kiristu izumu iwatsahi siharere bo batu h̄y tsimykaranaha Kiristu harere bo zuba ma tsimykaranaha. ¹⁸Asahi pahasapybyi tsihikiknahaze hi:

— Myharere bo yh̄y habyi zeka Deus sinini ykarawy bo pahapeha. Deus okzeka batu ahamysapy — mybarapetu mykaranaha. Siharere bo batu waby zikaha! Asa hi:

— Katsa zuba myhyrinymyrētsa babatsa — mybarapetu mykaranaha. — Mytsotospyk eze Deus bo tsikozonaha tsimykaranaha — mybarapetu mykaranaha. Hauk byize kytsa hi:

— O asaktsa simyharerewabyrētsa — maha niwahi mozihikiknaha. Bijoikpe iknyktsa Deus tsumuēhītsitsa bo iktsazuba maha. Hawa Deus bo tsimysakibazikiknaha asahi astsatu bijoikpe iknyktsitsa bo maha. Hawa mozihikiknaha zuba ana hi mykaranaha. Kytsa watsa mytsaty mykaranaha iwatsahi siharere batu ahawabyhy.

¹⁹Abaka asahi Sesus Kiristu humo batu sispirikpo. Hawa imysapybara ty mytsaty mykaranaha. Simysapybyitsa pahamyi tsihikiknaha. Kiristu myharek wata. Ituktsa inury watsa. Mynury humo tsimynapykyknahaze iwa Deus humo mozihikik. Tsimymypuhrynahaze mypaikrētsa tsimoziknaha. Nawa tatu Deus zikwy humo wasani mytsaty tsimykaranaha ihumo hi zuba myspirikporētsa tsimoziknaha Kiristu humo zuba mytsaty tsimykaranaha.

Katsaktsa mymypsabyitsa tsikykaranaha Deus nimyokzo.

Kiristu mysapzyzeky nihyrikosokda.

Abaka Kiristu tuk meky watu mysopyk tsimaha.

²⁰Katsaktsa mysapybyitsa tsikykaranaha ana hi tsimoewynaha. Tsikybakanahaze ba mytsaty zikaha anawahi katsaktsa Kiristu harere bo hȳy tsimynakaranaha, mysapybyitsa tsikykaranaha Kiristu zikwy humo tsimoewykynaha. Iwatsahi hyrikoso sapybara perytsa Satanas harere humo batu mykparawy. Iharere bo batu h̄y tsimykaranaha. Kytsa mysimiyiwynahatsa ahape maha: ²¹— Ikiahatsa na ahadisahawy my

zeka hauk hauk ahabyitaha! Tumy humo kino niwatihi tsō tsō byitaha. Ahanamy humo ka paik paik byitaha! — mykaranaha. Siharere bo batu h̄y tsimaha.

²² Disahawy soho humo ba h̄y ahasopyk. Mydisahawy tsipihauknaha zeka kyze ity tsipikaranaha. Mynamyhuhuk zeka moryryba. Asaktsa Deus mymyhrinymyryky nahatsa batu tyso zikaha, hawa mytsaty mykaranaha zuba ana humo hi mymyhrinymyryky tsihikiknaha.

²³ Kytsa sisopyk zubaha siharere piwabykynahaze mytsaty mykaranaha:

— O asaktsa ja sihyrinymyrētsa babatsa — mytsaty ahabyitsa mykaranaha. Sihyrinymyrētsa hyritywatsa asaktsa mybarapetu nikaranaha. Zimyikinaha. Kytsa asatu tahamyitsapyrikinaha zeka Deus harere bo batu h̄y mykaranaha. Kytsa tihi:

— Bijoikpe iknyktsa Deus tsumuēhītsitsa bo tsimysakibazikiknaha — maha. Iwa Deus harere bo batu h̄y zikaha. Asahi:

— O Deus katsaktsa ikia zuba mykparawy. Tsizubarēna ty abo nyny tsimaha — mybarapetu mykaranaha. Siharere ba zikmytsumuēhī. Batu isapy. Imysapybara ty tymoewy ahabyizeka ba ziksitsumuēhī. Zimyihikiknaha iwatsahi batu simysapy nikaranaha.

3 ¹Ikiahatsa kino tsiknahyrikponahatsa watsa iwatsahi Sesus tuk tuyzurukunahaktsa kytsa! Sesus harere bo zuba hȳy tynakaranahaktsa! Sesus Kiristu Deus wata my, atahi Deus tuk mynadyhyky siharere bo zuba hȳy tynakaranahaktsa!

² Sibo bijoikpe bo mytsaty tynakaranahaktsa. Hawa mynakaranaha bo hi mytsaty tsimykaranaha. Hawa Deus ahatsyhyryze mykara ana soho humo hi mytsaty tsimykaranaha. ³ Ikiahatsaktsa siakbatsa watsa. Tapara kytsa harere bo yh̄y ziknakaranaha. Abaka batu. Kiristu harere bo zuba ma tsinakaranaha. Atahi bijoikpe eze mynapykyryk. Deus tuk atatu my, iwatahi Deus hyrikoso mytuk mynapykyryk. Asaktsa Sesus harere bo batu ma zikaha batu sihyrinymyry iwatsahi batu sispirikpo. ⁴ Ikiahatsa hi ahamysapyrētsa tsimoziknaha. Kiristu humo mekywa tu tsimoziknaha. Iharere bo zuba ma tynakaranaha. Iwatahi ata kino mybarawy bo myziksoze ikiahatsa ituk tsimyzahakahazonaha. Kiristu humo ahamysapyrētsa tsimoziknaha. Atahi isopykziuhanikita my.

**Taparaka mysopykwy. Abaka Sesus sopykwy ezytyk ty
tsinakaranaha iwa Kiristu tuk tsimyzurukunaha.**

⁵ Ikiahatsa ahamysapybyity ziknakaranaha bo yh̄y yh̄y ahabyitahaktsa! Imysapybara ahamyzihik zeka awatutaha. Ustsa kytsa okeza ty ka hua hua byitaha. Kytsa wytykyryk mysioktyhyryknaha zeka myi myi byitaha ahasopyksapyhu ja. Makutsa ba zikarapewonaha. Ahabo zuba mytsaty mytsaty byitaha. Ahazokdi byihuja! Sizokdirētsa kytsa deusbyitsa pe yh̄y

sisopyk watsa maha. ⁶Ikiahatsa ana ty hi tsimykaranaha zeka Deus aha humo takyri. Ikiahatsa anatyhi ahasopykze Deus ahahumo takyri iharere bo batu hŷ zikaha.

⁷Taparaka ikiahatsa kino iwa zikzurukunaha. Ikiahatsa tsimyikiknaha ana humo zuba mytsaty tsikykaranaha.

⁸Abaka mekywatutaha! Ahamysapybyri tsimoewynaha. Ahaokani byihuja! Ahamysapy byihuja. Ahaharerewabymybara byihuja. Ahasakpare byihuja! Kytsa humo ka ahasakimyija byihu.

⁹⁻¹⁰Taparaka ahamysapybyitsa tsikykaranaha. Abaka Kiristu humo ahaspirikporētsa mekywa tu tsimoziknaha. Abaka Kiristu wata tsimoziktohinaha iwaze Deus soho humo ahahyrinymrētsa babatsa tsimoziknaha. Iwatsahi ahape ty spihikbata spihikbata byitaha! ¹¹Kiristu humo mekywa tu tsimaha, Sudeustsa Sudeutsabyitsa iwa Deus okzeka astsatu. Kytsa asahi sipiakzyzyktsa sipiakzyzykbyitsa Deus okzeka astsatu. Bipyrtsa sihyrinymrybyitsa, sitsumuēhītsitsa siokyrysarobyitsa asa kino Deus okzeka astsatu. Asaktsa Kiristu harere bo zuba ma mykaranaha. Ana bo hi zuba mytsaty tsimykaranaha. Iwaze Kiristu abazubata niyzik.

¹²Katsaktsa Sesus harere bo ma tsimykaranaha ana humo hi meky watu tsimoziknaha. Deus myhumo tsimypokztsiarēta babata iwatahi nimywatawy ityryktsa tsimoziknaha. Iokzeka wasani tsimaha. Mysapybyi ty tsimykaranaha zeka Deus mybo iktsa myze Sesus humo mymyokzohik iwatsahi tyharape pokztsikinahaktsa! Tyharape sakihiknaha. — Uta zuba kahyrinymrēta — ba ziky ustsa kytsa harere bo wabytaha! Ahamyzihikrētsa iwaze ustsa harere tsipiwbynaha. Ahakubyrisorokuja!

¹³Hawa hatsa kytsa pahasapybyikinaha zeka tysipokztsinaha.

Simymyijanikitsa tysipokztsinaha. Ba sihumo ahasakpare.

Ahakubyrisorokuja! Ahamysapybara ty tsikykaranaha ana hi Kiristu zahaokzo iwatsahi kytsa pahasapybyikinaha zeka tysiokzonaha awatutaha mytsaty mytsaty byijataha tysipokztsinaha iwaze Kiristu watsa tsimoziknaha. ¹⁴Iwa tsimyzurukunaha zeka wasani tsimaha. Tyharape pokztsikinahaktsa! Iwa tsimyzurukunaha zeka wasani my. Atsezubaha tsimypykyryknaha zeka ahakurētsa. Astsatu mytsaty tsimykaranaha. ¹⁵Kiristu zuba pahakusukniki iwatsahi astsa botu mytsaty tsimykaranaha. Ikiahatsa hi:

— O Kiristu tymytsumuēhīkta. Iwaze myhyrinymrētsa babatsa tsimoziknaha. Katsaktsa Kiristu humo atsa botu mytsaty tsimykaranaha — tsimaha. Ana humo hi Deus nimywatawyhik. Iwatsahi Deus bo tsimypamykysokonaha:

— O myzo ikia zuba tsamysapyrēta. Ikia humo ka mykurētsa — tsimykaranaha. ¹⁶Deus wasania ty Kiristu soho humo tyzurukunahaktsa! Kiristu wasaniha humo tyharape hyrinymrynah. Iwaze

myhyrinymyrētsa babatsa tsimoziknaha. Iwaze Deus hyrikoso humo tysakibazikiknahaktsa! Deus harere ty tysakibazikiknahaktsa! Ikiahatsa hi:

— O Deus myzo ikia zuba tsamysapyrēta — iwa tsimysakibazikiknahaze.¹⁷ Iwatsahi nawa ha ty tsimykaranaha zeka ana hi Jesus tuktsa pokzi tsimykaranaha. Nawa ha ty tsimytsasokonaha zeka ana hi Jesus pokzi tsimykaranaha. Iwaha hi Deus mozihikik atsatu tsimykaranaha. Deus bo tsimypamysoikiknaha:

— O Deus myzo tsamysapyrēta. Jesus mysapyzeky nihyrikosokda iwatahi tsamysapyrēta — tsimykaranaha.

**Abaka Kiristu humo ahamysapyrētsa tsimoziknaha
iwaze wasania ty tsimyzurukunaha.**

18 — O wytykyryk sipytsakaza ahapytsa harere bo yh̄y tynakaranaha. Ikiahaka Jesus tuk tsiza iwazahi ahapytsa harere bo yh̄y tynakaranaha. Iwa zeka wasani my — my.

19 Makutsa pe my — O kytsa ahaokeza humo ahamypokzitsihuktsa. Ba sihumo ahasakpare. Tysipokzitsikinaha. Iwa zeka wasani my — mykara.

20 — O ahahyrytsa kino niwatihi. Ikiahatsa ahazotsa harere bo ma tynakaranaha iwaha hi Deus mozihikik. Jesus tuktsa humo ahazotsa harere bo hȳy tynakaranaha. Iwa zeka wasani my — mykara.

21 — O sizotsa ahahyrytsa iwastuhu hatyty tynasipehakanaha. Tsimysibetsakiknaha zeka siakubyitsa moziknaha — mykara.

22 — O sitsumuēhītsitsa siokyrysarobyiktsa. Tyzibyituhukutunaha azihitsa harere bo zuba hȳy tynakaranaha. Iwaze “O ikia wasani tsimy” my, ana hi tsiwaby tsikhiknaha. Siharere eze zuba ba tarabajaziu zikaha. Jesus pokzi ahahyriziktsokzawy pykyhytutaha! Tarabajaziu tsimykaranaha humo tyzibyituhukutu naha. Azihitsa pahasukparaka zeka tarabajaziu tsimykaranaha. Azihitsa ahaty sukparabyize kino niwatihi tarabajaziu tsimykaranaha h̄y. Iwa zeka wasani my — mykara.

23 Ahahyriziktsokzawy humo. Ahakubyrisorokoktsa. Ikiahatsa azihitsa tsyhyryze tarabaja tsimykaranaha h̄y. Deus humo kino niwatihi itsyhyryze tatsumuēhīkī tsimykaranaha ana humo kino mytsatzyiu tsimaha. Iwatsahi ipokzi tarabajaziu tsimykaranaha.

24 Kiristu mypehakatsa babata my, ikia ituk hi tarabajaziu tsimykaranaha. Atahi isapyrēnikia ty mybo nyny my. Iwatsahi tarabajaziu tsimykaranaha zeka hawa ihuak ty mybo nyny my.²⁵ Katsa hi tamyi zeka sinini tsimykaranaha. Deus babata zuba mysoho humo tsyhyrinymyrēta amy ty mysoho motsasoko wasani my. Iwa h̄y.

4 ¹ — O sitsihitsitsa ahatsumuēhītsitsa asahi batu siokyrysaro humo nyny hukbyiktsa asa humo hi wasani tahaktsa!

Tysisakihiknahaktsa! Mytsatzyiutaha! Ikiahatsa humo kino ahapehakatsa

bijoikpe ezekta my. Atahi pahapokzitsiki ikiahatsa kino niwatihi tsimaha, ahatusmuēhītsitsa tysipokzitsikinaha — my.

Myspirikpowy.

²O kytsa Jesus tuktsa Deus bo tynapamykysoikiknahaktsa. Ahazikabiyuhuktsa Deus bo tsimypamykysonahaze wabyziutaha! Ikiahatsa hi:

— O Deus ikia humo ka mykurētsa — tsimynakaranaha. ³Deus bo tsinapamykysokonahaze katsa mybo kino tsimyzapykynaha. Katsaktsa Deus wasania ty tsimytsasokonahaze kytsa ba zikmykninaha ana humo hi tsimyzapyky tsihikiknaha. Taparaka Deus wasania ty Kiristu soho ty myzubaha bo batu tyso, abaka myzubaha bo wasaniha mybo motsasoko katsa eze tu tsimytsaso tsihikiknaha h̄y. Ikiahatsa Deus bo mytsyhyryze typamykysonahaktsa. Deus harere humo zuba ikykara tahi sakyriukrēnikitsa hurukwy bo zikoktyhyryknaha. ⁴Iwatsahi Deus bo tsimypamykysonahaze tsimyzapykykynaha:

— O myzo Pauro tuktsa tysitumuēhī. Wasani mypubara ty motsasoziunkunaha iwatsahi kytsa iharere piwabytoktonahaze — tsimaha. Iwa tahaktsa.

⁵Kytsa Jesus humo sispirikpobyitsa wasani taha. Ahaspirikpohuktsa ana hi pinynaha. Iwaze Jesus soho sibo tytsasonaha. ⁶Kytsa bo tsimypamykysokonahaze ahaharere tisapyrēna tsimaha. Kytsa ahaharere wasaniha humo siakparawy my. Iwaze piwabytoktonahaze. Ahaharere piwabynahaze — O siharere humo mykurētsa. Wasani my. Tahawaby tsihikik — maha.

Abaka pepykyk iwatahi mytukytsa bo mytsaty mykara.

⁷Tikiko kasoho ababo motsasoko. Atakta Jesus harere bo hȳy mynakara tahi atakta katsy wata. Atakta kakparawy, mytuk Jesus soho humo mymytsumuēhīekik. Jesus tsumuēhītsa babata my. ⁸Iwatahi ababo pipeha. Mysoho motsasokoze ahakurētsa tsimoziknaha. Hawa tsimyzurukunahaze anahi motsasoze pahakusukniwyky h̄y. Wasani my.

⁹Onesimu Tikiko tuk mokuru. Ata kino niwatihi Jesus harere bo hȳy mynakara iwatahi ihumo tispirkporēta. Wasani mozuruku. Katsaktsa ihumo mypokzitsirētsa. Atakta Korose ezekta my. Hawa tsimykaranaha ababo motsasonaha.

¹⁰Aristarakus katuk sakyriukrēnikitsa hurukwy eze mopykyryk. Atahi:

— O Korose ezektsa humo kahyrikbarēta mykara — niy. Marakos kino niwatihi ahahumo tsihyrikbarēta, atahi Baranabe tsy. Isoho botu ziwatahaka ababo pomo zeka ipe tsimaha:

— O pakutynykta! Kawahoro humo awanu ty hāitykta. Mytuk tsikadisaha! — tsimaha. ¹¹Sosue atsatu Sustas inarokota kino niwatihi

ikiahatsa humo tsihyrizikbarēta. Ata kino Sudeu. Harakykbyi Sudeutsa asaktsa katuk Jesus humo myzitsumuēhīkīnaha. Kytsa Jesus humo sispirikporētsa ana humo hi tarabaja mykaranaha. Iwatahi kakurēta. Ziktsumuēhīkīnaha humo kakurēta h̄y.

¹² Epaparas Jesus tsumuēhītsa niwatihi. Atakta ahudikhudikwy ezekta my ahahumo tsihyrizikbarēta. Atahi Jesus harere bo hȳ mynakara. Deus bo ahatsyhyryze mynapamykysoko. Atahi:

— O Deus myzo Korose ezektsa tysipunihikwyki iwatsahi Jesus humo batu sisikpyby. Asaktsa Jesus harere bo hȳ mynakaranaha iwatsahi ihumo sispirikporētsa. Sispirikporētsaze Jesus humo mospirikpotohinaha — my. ¹³ Atakta ahatsyhyryze tarabajaziu mykara ana humo hi kahyrinymyrēta. Kytsa Raodisija ezektsa, Hieraporis ezektsa iwatsa sizubarētsa tsyhyryze tarabajaziu mykara. Wasani mykara.

¹⁴ Rukas mediko mozororowykytsa katsaktsa ihumo mypokzitsirētsa. Atakta simyitsapyritsa nasipokzitsiki. Atakta Demas tuk aha humo sihyrizikbarētsa, ahasoho bo mytsaty mynakaranaha.

¹⁵ Katsa ustsa Jesus tuktsa humo myhyrizikbarētsa. Asaktsa Raodisija ezektsa. Ninapa bo asaktsa iwahoro eze ziknapykyknaha asa humo hi myhyrizikbarētsa.

¹⁶ Kyze papeu iwatahaha tsipinynahaze Raodisija ezektsa bo nyny tsimaha. Iwaze Raodisija ezektsa kino niwatihi tsipinynaha. Utakta usa papeu sibo iwatahaka ana hi kytsa zibykryyknaha. Asahi anapapeu ty ahabo nyny maha. Iwaze papeu zisapyzikynaha. Sipapeu iwatahaha tsipinynaha. ¹⁷ Arakipus pe tsimaha:

— O Arakipus mypehakatsa Jesus hyriziktsokzawy humo zipeha. Anaty tsimykta — tsimaha.

¹⁸ Abaka utatu piwatahaka, *Pauro ahahumo tsihyrizikbarēta mykara* ana kino piwatahaka. Deus bo katsyhyryze tsimypamykysokonaha. Siakyriukrēnikitsa hurukwy ezektatu mykara. Kahumo haspiriktsokdabyihu!

Deus pahasapywyky.

Deus bo uta kino ahatsyhyryze mopamykyso:

— O Deus myzo Korose ezektsa tysipokzitsi — my. Iwa. Niwazuba.

Pauro